

Уч юз ёшда вафот этган йигит



14:00 / 09.08.2022 4648

Нуҳ алайҳиссалом бир аёлнинг йиғлаётганини кўрдилар ва ундан: «Нега йиғлаяпсиз», деб сўрадилар.

Аёл: «Кичик ёшдаги ўғлим ўспиринлик пайтида вафот этди», деди.

Нуҳ алайҳиссалом: «Ўғлингиз неча ёшда эди», деб сўрадилар.

Онахон: «Уч юз ёшда эди», деб жавоб берди.

Нуҳ алайҳиссалом аёлнинг маҳзунлигини бироз енгиллатиш мақсадида: «Агар, ёшлари олтмишдан ошмайдиган уммат орасида яшаганингизда нима қилар эдингиз», деб сўрадилар.

Аёл: «Олтмиш йил яшайдиган кишилар ҳам бўладими?», деб сўради.

Нуҳ алайҳиссалом: «Ҳа», деб жавоб бердилар.

Аёл: «Шу қисқа муддат ичида уларнинг орасида Аллоҳга исён қиладиганлари ҳам бўладими?», деб сўради.

Нуҳ алайҳиссалом: «Уларнинг кўпи Аллоҳга исён қилувчи бўлади», дедилар.

Аёл: «Умрлари қисқа фурсатдан иборат бўлишига қарамай, уларнинг орасида дунёга қизиқадиганлари ҳам бўладими?», деб яна савол берди.

Нуҳ алайҳиссалом: «Ҳа, кўпларининг ягона ғами дунёга муҳаббат бўлади. Жуда озчиликлари охират ҳақида фикр юритадилар», дедилар.

Аёл яна : «Арзимас ишлар деб, талашиб тортишишлар бўладими уларда?, деб сўради.

Нуҳ алайҳиссалом: «Улар арзимас сабабларни деб бир-бирлари билан уришадилар», дедилар.

Аёл: «Улар шу қисқа умрлари мобайнида ўзларига кулбалар ҳам қурадиларми?», деб сўради.

Нуҳ алайҳиссалом: «Улар юз йилларни мўлжаллаб, қасрлар қурадилар.

Сўнг қасрларни тарк этиб, қабрларга жўнаб кетадилар», дедилар.

Шунда аёл: «Вой шўрим, агар мен ўша уммат орасида бўлганимда умримни дарахт соясида ўтказган, ҳаётим бўйи Аллоҳ азза ва жаллага сажда қилган бўлар эдим», деди.

Нозимжон Ҳошимжон таржимаси
Хуршид Маъруф тайёрлади